

四庫全書

史部

欽定四庫全書

史部
尚史卷十六
七

翰林院編修臣謝墉覆勘

總校官檢討臣何思鈞

欽定四庫全書

尚史卷十六

世家九

鑲白旗漢軍李銘撰

楚世家

始成王元年終秦始皇二十四年凡八百九十三年傳四十一世

鬻熊 熊麗 熊狂

楚之先祖出自帝顓頊高陽

史記世家高陽者黃帝之孫昌意之子詳帝紀

高陽生稱稱生卷章章生重黎重黎為帝嚳高辛居

火正甚有功能光融天下帝嚳命曰祝融共工氏作亂
帝嚳使重黎誅之而不盡帝乃以庚寅日誅重黎而以
其弟吳回為重黎後復居火正為祝融吳回生陸終陸
終生子六人

世家曰圻剖而產譙周古史考廢而不論殊是

長曰昆吾二曰參胡三曰彭祖四曰會人五曰曹姓六
曰季連芊姓楚其後也昆吾氏夏之時嘗為侯伯桀之
時湯滅之彭祖氏殷之時嘗為侯伯殷之末世滅彭祖

氏季連生附沮附沮生穴熊其後中微或在中國或在蠻夷弗能紀其世鬻熊季連之苗裔也鬻熊事文王蚤

卒

見諸子傳

其子曰熊麗熊麗生熊狂熊狂生熊繹

史記世家

熊繹 熊父 熊熙 熊勝 熊楊

熊繹楚始封之君也當周成王之時舉文武勤勞之後

嗣而封熊繹于楚蠻封以子男之田姓芊氏居丹陽楚

子熊繹與魯公伯禽衛康叔子牟晉侯燮齊大公子呂

伋俱事成王熊繹生熊父熊父生熊熙熊熙生熊勝熊

勝以弟熊楊為後

郝誕本楊作錫又作楊

熊楊生熊渠

史記世家

熊渠

熊翔

熊擊附

熊延

熊勇

熊嚴

熊霜

仲雪附

熊徇

熊罥

熊渠當周夷王之時王室微諸侯或不朝相伐熊渠甚

得江漢間民和乃興兵伐庸楊越至于鄂熊渠生子三

人熊渠曰我蠻夷也不與中國之號謚乃立其長子康

為句亶王

系本康作庸亶作袒

中子紅為鄂王

一本作襄紅襄音賢非是

少子

執疵為越章王

系本無執字越作就

皆在江上楚蠻之地及周厲

王之時暴虐熊渠畏其伐楚亦去其王後為熊母康母

康蚤死熊渠卒

史記世家

子熊翔即位卒長子摯有疾少子熊延即位

古史考

宋均樂緯注熊渠嫡嗣曰熊摯有惡疾不得為後別居于夔為楚附庸後王命曰夔子也按史記熊渠

子三人又曰母康蚤死熊渠卒子熊摯紅立摯紅卒其弟弑而代立曰熊延所謂母康或即長子康摯紅或即中子紅而熊延者豈即少子執疵歟又曰弑而

代立所弑為誰復不可知所叙不甚詳晰今姑從燕說

熊延生熊勇熊勇六年而周人作亂攻厲王厲王出奔
羣熊勇十年卒弟熊嚴為後熊嚴十年卒有子四人長
子伯霜中子仲雪次子叔堪少子季徇熊嚴卒長子伯
霜即位熊霜元年周宣王初立熊霜六年卒三弟爭立
仲雪死叔堪亡避難于濮而少弟季徇即位是為熊徇
熊徇二十二年卒子熊罾即位熊罾九年卒子熊儀即

位

史記世家

熊儀

若敖

熊坎

霄敖

熊眴

蚡冒

熊儀是為若敖。若敖元年，周宣王三十八年也。若敖二十年，幽王為犬戎所弑。周東徙二十七年，若敖卒，子熊坎即位，是為霄敖。霄敖六年卒，子熊眴即位，是為蚡冒。

蚡冒十七年卒，其子即位。

史記世家

武王

十九年
八春秋

武王名熊通，蚡冒之弟也。蚡冒卒，通弑其子而代立，是

為楚武王

史記世家

武王十九年魯隱公即位二十一年

隱三年

周平王崩桓

王立三十五年

桓六年

我侵隨

國名

使遂章求成三十七年

桓八年

武王合諸侯于沈鹿黃隨不會

黃亦國名

使遂章讓黃

王伐隨隨及我平乃盟而還

左傳

是年楚自立為武王始開濮地而有之

史記世家

世家楚伐隨曰我蠻夷也欲觀中國之政請王室尊

吾號隨為之請王室不聽熊通怒曰吾先鬻熊文王

之師也蚤終成王舉我先公乃以子男田令居楚蠻

夷皆率服而王不加位我自尊耳乃自立為武王

三十八年

桓九年

我圍鄧鄆

鄆邑

敗鄧師鄆潰四十年

桓十一年

我將盟貳軫

二國名

鄆人將與隨絞州蓼

絞州蓼三國名

伐我師

我敗諸蒲騷及貳軫盟四十一年

桓十二年

伐絞大敗之為

城下之盟而還伐絞之役羅

熊姓國

人欲伐我四十二年

桓十三年

伐羅我師敗績屈瑕繼羣帥囚于冶父以聽刑王

曰孤之罪也皆免之四十四年

桓十五年

周桓王崩莊王立

五十一年

莊四年

王荆尸授師子馬以伐隨

荆亦楚號尸陳也更為楚

陳兵之法楊雄方言了者戟也然則楚始于此叅用戟為陳

春三月王薨于櫛木之

下令尹闔祈莫敖屈重除道梁澁營軍臨隨隨懼行成

屈重入盟且請為會于漢汭而還濟漢而後發喪

左傳

謚曰武在位五十一年

文王

文王名熊賁武王之子也文王二年

莊六年

王伐申自申

還伐鄧

說苑文王伐鄧使王子革王子靈捃萊二子見老人
載畚乞馬不與搏而奪之王聞之拘二子將殺之大
夫辭曰殺之非其罪也言卒丈人造軍而言曰鄧無
道故伐之今君公之子搏而奪吾畚無道甚于鄧君
見之曰討有罪而橫奪非所以禁暴也恃力虐老非
所以教幼也愛子棄法非所以保國也私二子滅
三行非所以從政也丈人舍之矣謝之軍門之外

六年

莊十年

王伐息

國名

蔡救息我敗蔡師于莘以蔡侯獻

舞歸八年

莊十年

周莊王崩僖王立初蔡哀侯繩息媯以

語王王如息以食入享遂滅息以息媯歸十年

莊十四年楚

子以息媯故伐蔡入之十二年

莊十六年

伐鄭及櫟十三年

莊十七年

周僖王崩惠王立十四年

莊十八年

閻敖之族為亂

閻敖

大夫先是文王教之

冬巴人因之以伐我

巴國名

十五年

莊十九年

九年

王禦巴師大敗于津還鬻拳

大夫

弗納遂伐

黃

國贏姓

敗黃師于蹇陵還及湫有疾夏六月薨葬夕室

左傳

謚曰文在位十五年

史記世家十三年卒淮南子楚文王好服獬冠楚國效之又曰文王污膺鮑申偃背以成楚國之治說苑荆文王得如黃之狗箇露之繒畋于雲夢二月不反得舟之姬暮年不聽朝保申諫曰先王卜以臣為保吉今王罪當笞匍伏將笞王王曰不穀託于諸侯矣願請無笞保申曰臣承先王之命無敢廢王不受笞是廢先王之命也王曰敬諾乃席王王伏束細箭五

十跪而加之王背如此者再王曰有咎之名一也遂致之保申曰臣聞之君子恥之小人痛之恥之不變痛之何益保申趨出欲自流王曰此不殺之過保何罪乃變行從保申殺如黃之狗折筭路之矰逐舟之姬務治乎荆呂覽舟作舟

堵敖 成王

堵敖

楚始號君曰敖自此以下以未成君者曰敖

名熊羆文王之子堵敖元

年魯莊公之二十年也

史記世家在十八年

在位三年弟熊惲弑

之而代立是為成王成王四年

莊二十三年

始聘于魯六年

莊二十八年

我伐鄭諸侯救鄭我師夜遁八年

莊三十一年

殺令尹

公子元十三年

僖元年

始改號曰楚秋伐鄭

鄭即齊故

十四年

僖二年

侵鄭十五年

僖三年

伐鄭十六年

僖四年

齊以諸侯之

師侵蔡蔡潰遂伐我王使屈完如師屈完及諸侯盟于

召陵十七年

僖五年

滅弦

國名

十八年

僖六年

諸侯伐鄭我圍

許以救鄭諸侯救許乃還冬蔡侯將許男見王于武城

許男面縛銜璧大夫哀經士與櫬王問諸蓬伯對曰昔

武王克殷微子啟如是武王親釋其縛受其璧而祓之

焚其櫬禮而命之使復其所王從之二十年僖八年周惠

王崩襄王立二十三年僖十年黃人不歸我貢我伐黃滅

之二十七年僖十五年我伐徐諸侯伐厲楚與國以救徐冬我

敗徐于婁林二十八年僖十六年齊伐厲明年伐英氏楚與國

以報婁林之役三十年僖十八年鄭伯始來朝王賜之金既

而悔之與之盟曰無以鑄兵故以鑄三鐘三十二年僖二十二年

十隨以漢東諸侯叛我我伐隨取成而還三十三年僖二十三年

十一 及宋人齊人盟于鹿上秋王及諸侯宋陳蔡鄭許曹會于

孟執宋公以伐宋冬會于薄以釋之三十四年僖二十二年

宋伐鄭我伐宋以救鄭及宋師戰于泓宋師敗績鄭勞

王于柯澤王取鄭二姬以歸三十五年僖二十三年伐陳取

焦夷城頓四邑名而還三十六年僖二十四年我及宋平宋公

來朝周王子帶以狄師伐周周襄王處于汜三十七年

僖二十五年晉納襄王殺王子帶秋秦晉伐小國名都我以申

息之師伐都別邑商密降秦秦因闕克屈禦寇二公子

以歸三十八年

僖二十六年

魯公子遂來乞師道我伐齊宋

秋我滅夔以夔子歸宋叛我即晉冬伐宋圍緡魯侯以

我師伐齊取穀寘桓公子雍于穀申公叔侯戍之三十

九年

僖二十七年

王及諸侯

陳蔡鄭許

圍宋四十年

僖二十八年

晉伐

曹衛以救宋王入居于申使申公叔侯去穀使成得臣

去宋曰無從晉師得臣請戰王怒少與之師得臣及晉

師戰于城濮我師敗績我殺得臣衛侯來奔四十四年

僖三十三年

晉楚平四十五年

僖三十三年

令尹闔勃侵陳蔡陳

蔡成遂伐鄭

將納公子穀

晉侵蔡我救之不戰而歸王殺鬬

勃四十六年

文元年

冬十月天子商臣以宮甲圍王王請

食熊蹯而死弗聽丁未王縊謚之曰靈不暝曰成乃暝

左傳

在位四十六年

穆王

王名商臣成王之大子也成王既立商臣又欲立王子

職商臣遂殺成王而自立是為穆王王二年

文三年

我圍

欽定四庫全書

尚史
卷十六

十

江

江國名

晉伐我以救江冬晉告于周周及晉伐我門于

方城而還三年

文四年

我滅江四年

文五年

滅六冬滅蓼

六

並國名

七年

文八年

周襄王崩頃王立八年

文九年

王師于狼

淵以伐鄭鄭及我平夏侵陳克壺邱秋公子朱伐陳陳

人敗之獲公子茂陳懼及我平冬使越椒如魯聘九年

文十年

鬬宜申與仲歸謀弑王王殺宜申及仲歸秋陳鄭

會王于息遂及蔡侯次于厥貉將以伐宋宋逆王遂導

以田孟諸十年

文十一年

伐麋十一年

文十二年

羣舒叛

舒偃姓

我

執舒子平及宗子遂圍巢

宗巢二國
羣舒之屬

十二年

文十三年

王薨

左傳

謚曰穆在位十二年

莊王

莊王名旅

史記名侶

穆王之子也元年

文十四年

春周頃王崩匡

王立秋令尹成嘉大師潘崇將襲羣舒使公子變與鬬

克守變克作亂城郢使賊殺成嘉不克而還秋八月變

克以王出將如商密廬戰黎

守廬大夫

誘之殺變及克

史記莊王即位三年不出號令日夜為樂令國中曰
敢諫者死伍舉入王左抱鄭姬右抱越女坐鐘鼓之
間伍舉曰願有進隱曰有鳥在阜三年不蜚不鳴是
何鳥也王曰三年不蜚蜚將冲天三年不鳴鳴將驚
人舉退矣吾知之矣居數月淫益甚大夫蘇從入諫
王曰若不聞令乎對曰殺身以明君臣之願也于是
罷淫樂聽政所誅者數百人所進者數百人任伍舉
蘇從以政國人大說吳越春秋作伍舉說苑作蘇從

呂氏春秋作成公賈韓非子作右司馬御新序作士
慶

三年

文十
六年

庸人帥羣蠻以叛廬戢黎侵庸王乘駟會師

于臨品秦人巴人從我師羣蠻從王盟遂滅庸六年

宣元

年

王侵陳遂侵宋晉伐鄭我救鄭晉師還七年

宣二
年

晉

侵鄭我救之晉師去

新序晉伐楚三舍不止大夫請擊之莊王曰先君之
時晉不伐楚及孤之身而伐楚是孤之過也大夫曰

先臣之時晉不伐楚今臣之身而伐楚此臣之罪也
請擊之王俛而泣起而拜羣大夫晉人聞之曰君臣
爭以過為在已且君下其臣不可伐也乃夜還師韓
非子莊王欲伐越杜子諫曰王之伐越何也曰政亂
兵弱杜子曰臣愚患知之如目也能見百步之外而
不能自見其睫王之兵敗于秦晉喪地數百里此兵
之弱也莊蹊蹻為盜于境內而吏不能禁此政之亂
也王之弱亂非越之下也欲伐越此知之如目也王

乃止說苑莊王伐陽夏師久而不罷王獵于雲夢椒
舉進諫曰王所以多得獸者馬也而王國亡王之馬
豈可得哉王曰不穀知詘強國之可以長諸侯也知
得地之可以為富也而忘吾民之不用也明日飲諸
大夫酒以椒舉為上客罷陽夏之師又曰莊王欲伐
晉使豚尹觀焉反曰不可伐也其憂在上其樂在下
且賢臣在焉曰沈駒明年又使豚尹觀反曰可矣初
之賢人死矣諂諛多在君之廬其君好樂而無禮其

下危處以怨上伐之民必先反韓詩外傳莊王將伐
晉孫叔敖以螳螂黃雀諫語同國語莊辛 諸說皆

無徵

冬周匡王崩定王立八年

宣三年

王伐陸渾之戎遂至于

雒觀兵于周疆定王使王孫滿勞王王問鼎之大小輕

重焉對曰在德不在鼎周德雖衰天命未改鼎之輕重

未可問也鄭即晉夏我侵鄭九年

宣四年

令尹越椒殺蒍

賈將攻王王以三王之子為質

三王文成穆

弗受王與若敖

氏戰于臯澣滅之冬伐鄭十年

宣五年

伐鄭陳及我平晉

救鄭伐陳十一年

宣六年

伐鄭取成而還既成鄭伯逃歸

十三年

宣八年

滅舒蓼王疆之及滑汭盟吳越而還冬伐

陳取成而還十四年

宣九年

伐鄭

鄭伯逃歸故

晉救鄭鄭敗我

師于柳林十五年

宣十年

鄭及我平諸侯伐鄭鄭又及諸

侯平冬我伐鄭晉救之逐我師于潁北十六年

宣十一年

我

伐鄭及櫟鄭成夏王及陳侯鄭伯盟于辰陵鄭又徵事

于晉陳弑靈公冬伐陳遂入陳殺夏徵舒納公孫寧儀

行父于陳

說苑莊王伐陳使人視之使者曰不可伐也城高溝
深蓄積多其國寧也王曰陳小國也而蓄積多賦斂
重矣城高溝深民力罷矣伐陳遂取之又有莊王伐
陳吳救之左史倚相敗吳師事 按陳至弑君何謂
國寧倚相亦不當莊王時說謬

十七年

宣十年

春王圍鄭克之鄭伯肉袒牽羊以逆左右

曰不可許也得國無赦王曰其君能下人必能信用其

民矣庸可幾乎退三十里而許之乎

公羊莊王伐鄭鄭伯肉袒以逆莊王莊王親自手旌
左右撓軍退舍七里將軍子重諫曰南郢之與鄭相
去數千里諸大夫死者數人廝役扈養死者數百人
今君勝鄭而不有無乃失民臣之力乎莊王曰古者
杆不穿皮不蠹則不出于四方是以君子篤於禮而
薄于利要其人而不要其主告從不赦不祥吾以不
祥道民災及吾身何日之有

潘阂入盟鄭公子去疾出質夏六月晉師救鄭濟河王
北師次于邲將飲馬于河而歸聞晉師既濟王欲還嬖
人伍參欲戰王改乘轅而北之次于管以待之

公羊晉師救鄭者至請戰莊王許諾將軍子重諫曰
晉大國也王師淹病矣君請勿許也莊王曰弱者吾
威之强者吾辟之是使寡人無以立乎天下令之還
師而逆晉寇

晉師在敖鄆之間王使少宰如晉師且使求成于晉晉

人許之盟有日矣我使樂伯致晉師既免晉使魏錡來
請戰趙旃來召盟王乘左廣逐趙旃會晉使軫車逆之
潘黨望其塵告曰晉師至矣我亦懼王之入晉軍也遂
出陳疾進師車馳卒奔來晉軍晉師右移上軍未動工
尹齊將右拒卒以逐下軍王使唐狡與蔡鳩居並大告

唐惠侯曰不穀不德而貪以遇大敵不穀之罪也然楚
不克君之羞也敢藉君靈以濟楚師使潘黨將游闕四
十乘從唐侯以為左拒以從上軍及昏我師軍于邲晉

之餘師不能軍宵濟亦終夜有聲丙辰楚重至于郢遂
次于衡雍潘黨曰君盍築武軍而收晉師以為京觀臣
聞克敵必示子孫以無忘武功王曰非爾所知也夫文
止戈為武武王克商作頌曰載戰于戈載櫜弓矢我求
懋德肆于時夏允王保之又作武其卒章曰耆定爾功
其三曰敷時繹思我徂惟求定其六曰綏萬邦屢豐年
夫武禁暴戢兵保大定功安民和衆豐財者也故使子
孫無忘其章今我使二國暴骨暴矣觀兵以威諸侯兵

不戢矣暴而不戢安能保大猶有晉在焉能定功所違
民欲猶多民何安焉無德而強爭諸侯何以和衆利人
之幾而安人之亂以為已榮何以豐財武有七德我無
一焉何以示子孫其為先君宮告成事而已武非吾功
也古者明王伐不敬取其鯨鯢而封之以為大戮于是
乎有京觀以懲淫慝今罪無所而民皆盡忠以死君命
又何以為京觀乎祀于河作先君宮告成事而還

新書莊王伐鄭南與晉戰于兩棠大克晉人王歸過

申侯之邑申侯進食日中而王不食申侯請罪王歎
曰吾聞之君賢而有師者王中君而有師者霸下君
而羣臣莫若者亡今我下君也而羣臣又莫若不穀
不穀恐亡且世不絕賢天下有賢而我獨不得若吾
生者何以食為呂氏春秋莊王獵于雲夢射隨咒中
之申公子培刼而奪之王曰何暴而不敬也命吏誅
之大夫諫曰子培胥者也此必有故願察之不出三
月子培疾而死兩棠之戰大勝晉歸而賞功子培之

弟請賞曰臣兄之有功也于車下王曰奚謂也對曰
臣之兄嘗讀故記曰射隨兕者不出三月臣之兄懼
而爭之故死王命發平府書而視之于故記有焉乃
厚賞之說苑莊王好獵大夫諫曰晉敵國也楚不謀
晉晉必謀楚今王無乃耽于樂乎王曰吾獵以求士
也其榛叢刺虎豹者吾以知其勇其攫犀搏兕者吾
以知其勁有力罷田而分所得吾以知其仁因是道
也而得三士焉又曰莊王賜羣臣酒日暮酒酣燭滅

有引婦人之衣者美人援絕其冠纓告王曰今者燭滅有引妾衣者妾援得其冠纓趣火來上視絕纓者王曰賜人酒使醉失禮奈何欲顯婦人之節而辱士乎乃命曰今日與寡人飲不絕纓者不懽羣臣皆絕其冠纓而上火卒盡歡而罷居二年晉與楚戰有一臣常在前五合五獲首却敵卒得勝之王怪而問曰寡人未嘗異子子何出死不疑對曰臣夜絕纓者也又曰莊王與晉戰勝之懼諸侯之畏已也乃築為五

仞之臺而觴諸侯諸侯請約莊王曰我薄德之人也
仰而曰將將之臺窅窅其謀我言而不當諸侯伐之
于是遠者來朝近者入賓又曰莊王築層臺延石千
重延壤百里諫者七十二人皆死諸御已諫遂解層
臺而罷民淮南子令尹子佩請飲莊王莊王許諾子
佩疏揖北面立于殿下曰昔者王許之今不果往意
者臣有罪乎王曰吾聞子具于強臺強臺者南望料
山以臨方皇左江而右淮其樂忘死吾薄德之人不

可以當此樂也 諸說荒誕呂覽尤妄

鄭伯許男來冬伐蕭

附庸國

宋以蔡人救之遂滅蕭十八

年

宣十三年

伐宋十九年

宣十四年

鄭伯來謀晉王使申舟聘于

齊無假道于宋宋殺之秋九月王圍宋二十年

宣十五年夏

五月宋及我平二十三年

宣十八年

秋七月王薨

左傳

韓非子莊王有茅門之法曰羣臣入朝馬蹄踐雷者

斬其輶而戮其御太子入朝馬蹄踐雷廷理斬其輶

而戮其御太子入泣曰為我誅廷理王曰法者所以

敬宗廟尊社稷夫犯法廢令不尊敬社稷是臣乘君
下尚校也臣乘君則主失威下尚校則上位危社稷
不守何以遺子孫天子乃還走避舍再拜請死說苑
作少師慶尸子雨雪莊王被裘當戶曰我猶寒彼百
姓賓客甚矣乃使巡國中求百姓賓客之無居宿絕
糧者賑之國人大說說苑莊王見天不見妖地不出
孽則禱于山川曰天其忘予歟淮南子莊王好雉冠
楚國倣之又曰莊王裾衣博袍令行乎天下遂霸諸

侯

謚曰莊在位二十三年

共王

共王名審莊王之子也王二年

成二年

王將伐魯使屈巫

聘于齊告師期適魯會晉伐齊我侵魯及陽橋以救齊

魯請盟許之冬十一月公子嬰齊及魯侯蔡侯許男諸

侯之大夫

秦宋陳衛鄭齊曹邾許鄭

盟于蜀三年

成三年

諸侯伐鄭鄭

敗諸邱與皇戌來獻捷我歸荀瑩于晉四年

成四年

晉伐

鄭我救之五年

成五年

許惇鄭于我我執鄭皇成鄭叛我

及晉平冬定王崩簡王立六年

成六年

伐鄭晉救之遇于

繞角我師還晉師遂侵蔡我救蔡禦諸桑隧晉師還七

年

成七年

伐鄭諸侯救鄭鄭軍我師因鍾儀獻諸晉八年

年

成八年

晉侵蔡遂侵我獲申驪九年

成九年

我以重賂求鄭

鄭伯會公子成于鄧秋晉執鄭伯伐鄭我侵陳以救鄭

晉歸鍾儀于我以求成冬自陳伐莒莒潰遂入鄆十二

月使公子辰如晉報鍾儀之使請修好結成十一年

成十年

一 宋華元來遂如晉合晉楚之成十二年

成十二年

夏五月

公子罷許偃會晉士燮盟于宋西門之外諸侯遂會于

瑣澤晉卻至來聘且涖盟冬公子罷如晉聘且涖盟十

二月及晉侯盟于赤棘十五年

成十五年

我侵鄭遂侵衛鄭

侵我取新石冬遷許于葉十六年

成十六年

王使公子成以

汝陰之田求成于鄭鄭叛魯及王盟于武城晉伐鄭王

救之晉楚遇于鄢陵及戰射王中目王宵遁殺公子側

以公子嬰齊為令尹

淮南子恭王戰于陰陵潘廙養由基黃衰微公孫丙
相與篡之王懼而失體黃衰微舉足蹙其體王乃覺
怒其失禮奮體而起四大夫載而行

十七年

成十七年

我伐鄭晉會諸侯伐鄭我救之諸侯還冬

諸侯復伐鄭我救之諸侯還十八年

成十八年

鄭會王伐宋

彭城納宋魚石向為人鱗朱向帶魚府以三百乘戍之

而還宋圍彭城我救之伐宋宋告急于晉晉侯師于台

谷以救宋遇我師于靡角之谷我師還十九年

襄元年

晉

會諸侯伐鄭晉師自鄭侵我焦夷及陳秋我救鄭侵宋

呂留周簡王崩靈王立二十年

襄二

殺右司馬公子申

二十一年

襄三

公子嬰齊伐吳克鳩茲至于衡山使鄧

廖侵吳吳獲鄧廖師歸吳伐我取駕嬰齊卒以公子壬

夫為令尹陳叛我冬侵陳陳成公卒乃止二十二年

襄四

年侵陳二十三年

襄五

討陳叛故殺公子壬夫以公子

貞為令尹冬公子貞伐陳諸侯救陳二十五年

襄七

貞

圍陳諸侯會于鄆以救之陳使公子黃來

哀公

執之二

十六年

襄八年

鄭侵蔡我伐鄭鄭成二十七年

襄九年

秦使

來乞師將伐晉許之秋共王師于武城以為秦援冬諸

侯伐鄭十二月復伐鄭鄭成我伐鄭鄭又及我平同盟

于中分

鄭城中
里名

二十八年

襄十年

我及鄭圍宋秋侵魯西

鄙還圍蕭諸侯伐鄭城虎牢而戍之鄭及晉平公子貞

救鄭鄭又與我盟諸侯之師還我師亦還二十九年

襄十一年

諸侯圍鄭鄭成同盟于亳公子貞乞旅于秦以代鄭

鄭伯逆之伐宋秋諸侯悲師以復伐鄭鄭成冬鄭及諸

侯會于蕭魚三十年

襄十二年

我及秦伐宋

報晉取鄭故

秦嬴歸

于我

秦景公妹為共王夫人

我使公子午聘于秦三十一年

襄十三年

王疾告大夫曰不穀不德少主社稷生十年而喪先君

未及習師保之教訓而應受多福是以不德而亡師于

鄆以辱社稷為大夫憂其弘多矣若以大夫之靈獲保

首領以歿於地唯是春秋寔宥之事所以從先君于禰

廟者請為靈若厲大夫擇焉莫對及五命乃許冬十二

月王薨公子貞謀謚大夫曰君有命矣貞曰君命以共

若之何毀之赫赫楚國而君臨之撫有蠻夷奄征四海
以屬諸夏而知其過可不謂共乎請謚之大夫從之

左傳

在位三十一年

康王

康王名昭共王之子也共王三十一年

襄十三年

薨王即位

是年吳侵我戰于庸浦大敗吳師王元年

襄十四年

公子貞

伐吳師還弗傲吳人自臯舟之隘要而擊之敗我師冬

公子貞卒公子午為令尹三年

襄十六年

晉伐我我及晉師

戰于湛阪我師敗績晉師遂侵方城之外五年

襄十年鄭

公子嘉欲去諸大夫將叛晉而起我師以去之冬十二

月使告公子午午不許王聞而讓午午曰諸侯方睦于

晉臣請嘗之午治兵于汾鄭知之完守入保公子嘉不

敢會我師我師伐鄭門于純門信于城下而還涉于魚

齒之下甚雨及之我師多凍役徒幾盡八年

襄二十一年公

子午卒使遠子馮為令尹馮辭以疾使公子追舒為令

尹九年

襄二十二年

殺公子追舒復使遠子馮為令尹十一

年

襄二十四年

我為舟師伐吳不為軍政無功而還齊侯伐

晉懼而欲見王王使遂啟疆如齊聘秋齊陳無宇來乞

師諸侯將伐齊冬王伐鄭以救齊諸侯還救鄭王使遂

啟疆送陳無宇十二年

襄二十五年

遂子馮卒屈建為令尹

舒鳩人叛屈建伐之吳救之大敗吳師滅舒鳩冬十二

月吳子伐我門于巢巢人牛臣射殺之十三年

襄二十六年

我及秦人侵吳遂侵鄭秋許男來請伐鄭遂卒于楚王

曰不伐鄭何以求諸侯冬伐鄭涉于汜而歸十四年

襄二十二年

十七年 宋向戌欲弭諸侯之兵如晉告晉許之告于我我

亦許之告于諸侯皆許之秋七月屈建及諸侯之大夫

盟于宋蒙門之外晉荀盈來蒞盟冬遂罷如晉蒞盟十

五年

襄二十八年

秋九月鄭伯來冬十一月魯侯宋公陳侯

許男來十二月靈王崩景王立乙未王薨明年夏四月

葬王諸侯送葬至于西門之外諸侯之大夫皆至于墓

左傳

謚曰康在位十五年

邾敖

邾敖名櫟康王之子也邾敖元年

襄二十九年

屈建卒公子

圍

康王庶弟

為令尹二年

襄三十年

使遠罷如魯聘秋公子圍殺

大司馬蔣掩而取其室三年

襄三十一年

衛侯來四年

昭元年

公子圍聘于鄭且娶于公孫段氏遂及諸侯之大夫會

于號冬公子圍將聘于鄭未出竟聞王有疾而還十一

月至入問王疾縊而殺之遂殺其二子幕及平夏殺大

宰伯州犁于邾葬王于邾謂之邾敖

左傳

在位四年無謚

靈王

靈王初名圍，共王之子，康王之庶弟也。初為令尹，邾敖

四年

昭元年

弑邾敖而自立，改名虔，是為靈王。以遠罷為

令尹。是年，鄭游吉來，葬邾敖，且聘立君王。二年

昭三年

鄭

伯來，與之田于江南之夢。三年

昭四年

許男來，王止之，遂

止鄭伯，復田江南，使椒舉如晉，求諸侯，且請昏。晉許之。

夏六月，王及諸侯

蔡陳鄭許徐滕
頓胡沈小邾宋

淮夷會于申。徐子吳

出也以為貳執于中秋七月王以諸侯伐吳圍朱方執

齊慶封殺之遂滅賴還賴于鄢欲還許于賴伐闕韋龜

與公子去疾城之而還冬吳伐我入棘櫟麻東國水不

可以城彭生

楚大夫

罷賴之師四年

昭五年

殺大夫屈申

貳于

吳故以屈生

屈建子

為莫敖使與蘧罷如晉逆女晉韓起來

送女羊舌肸為介王欲以起為閭肸為司宮以辱晉蘧

啟疆進說乃厚為之禮冬十月王以諸侯

蔡陳許頓沈徐越

伐

吳吳子使其弟蹇由來犒師執之將以蒙鼓既而赦之

及汝清吳不可入遂觀兵于坻箕之山無功而還王懼

吳使沈尹射待命于巢遂啟疆待命于雩婁五年

昭六年

公子棄疾如晉秋徐儀楚

徐大夫

來聘王執之逃歸懼其

叛也伐徐吳救之遂罷伐吳吳敗我師于房鍾六年

昭七年

年

王成章華之臺願與諸侯落之遂啟疆曰臣能得魯

君遂如魯召魯侯魯侯來王享之于新臺好以大屈

名弓

既而悔之遂啟疆說魯侯使反之

新書程使至楚楚王誇以章華之臺臺甚高三休乃

至楚王曰翟亦有此臺乎使者曰否翟寔國惡見此臺也翟王之室也堂高三尺壤陞三綦茆茨弗翦采椽弗刮猶以作者大苦居者大佚翟惡見此臺也

七年

昭八年

陳殺其世子偃師哀公縊使行人干徵師來

赴殺之秋公子去疾圍陳冬滅陳使穿封戌為陳公八

年

昭九年

諸侯之大夫

魯宋鄭衛

會王于陳公子去疾遷許于

夷然丹還城父人于陳遷方城外人于許夏四月陳災

十年

昭十一年

王在申召蔡侯伏甲而饗之殺蔡侯刑其士

七十人

蔡侯弑父故

公子棄疾圍蔡晉使請蔡弗許冬滅蔡

用隱大子于岡山遂城陳蔡不羹使棄疾為蔡公十一

年

昭十年

殺大夫成熊

今尹成得臣孫

冬圍許以懼吳王次于乾

谿以為之援十二年

昭十年

春王在乾谿初王之殺邲教

也公子比出奔晉公子黑肱出奔鄭及是黑肱公子棄

疾因四族

遂氏許圍蔡有蔓成然

之徒以入楚殺大子祿及公子

罷敵公子比為王黑肱為令尹棄疾為司馬先除王宮

使觀從從師于乾谿而告之師潰

公羊靈王為無道作乾谿之臺三年不成楚公子棄疾脅比而立之然後令于乾谿之役曰比已立矣後歸者不得復其田里衆罷而去之

王聞羣公子之死也自投于車下曰人之愛其子也亦如余乎侍者曰甚焉小人老而無子知擠于溝壑矣王曰余殺人子多矣能無及此乎然丹曰請待于郊以聽國人王曰衆怒不可犯也曰若入于大都而乞師于諸侯王曰皆叛矣曰若亡于諸侯以聽大國之圖君也王

曰大福不再祇取辱焉王浚夏將欲入鄆

史記靈王獨傍徨山中野人莫敢入王王行遇故
人謂曰為我求食我已不食三日矣媮人曰新王下
法有敢饗王從王者罪及三族且又無所得食王枕
其股而卧媮人以土自代逃去王覺而弗見遂饑弗
能起

申亥求王遇諸棘闔以歸夏五月王縊于申亥氏申亥
以其二女殉而葬之平王時申亥以王柩告乃改葬之

初王卜曰余尚得天下不吉投龜詬天而呼曰是區區者而不余畀余必自取之民患王之無厭也故從亂如

歸

左傳

墨子靈王好士細腰王之臣皆以一飯為節肱息然後帶扶牆然後起期年朝有鰲黑之危春秋繁露靈王行強乎陳蔡意廣以武不顧其行慮所美內罷其衆乾谿有物女水盡則女見水滿則不見靈王舉發其國而役三年不罷楚國大怒繁露語頗未詳

在位十二年謚曰靈

平王

公子
比附

平王名棄疾及公子比公子黑肱皆共王之子靈王之弟也棄疾初事靈王遷許滅陳皆有功及滅蔡遂為蔡

公靈王十二年

昭十三年

王在乾谿觀從自蔡召比及黑肱

入襲蔡蔡公將食見之而逃觀從徇于蔡曰蔡公召二

子將納之衆乃奉蔡公召二子而盟于滕依陳蔡人以

國遂入楚及郊陳蔡欲為名故請為武軍

欲築壘壁示
後人為復讐

之
名蔡人知之曰欲速

言宜速入

且役病矣請藩而已乃藩為

軍蔡公使須務牟與史裨

並大

先入因正僕人殺太子

祿及公子罷敵比自立為王黑肱為令尹次于魚陂蔡

公為司馬先除王宮觀從謂比曰不殺棄疾雖得國猶

受禍也比曰余不忍也觀從曰人將忍子夏五月靈王

縊國人未及知國每夜駭曰王入矣乙卯夜蔡公使周

走而呼走曰王至矣國人大驚使闕成然走告比及黑

肱曰王至矣國人殺君司馬將來矣君若早自圖也可以

無辱衆怒如水火焉不可為謀又有呼而走至者曰衆至矣比黑肱皆自殺比字子干初為右尹黑肱別有傳丙辰棄疾即位改名曰熊居是為平王葬比于訾謂之訾教殺囚衣之王服而流諸漢乃取而葬之以靖國人使鬪成然為令尹平王封陳蔡復遷邑致羣賂施舍寬民宥罪舉職使枝如子躬聘于鄭初共王無冢適有寵子五人無適立焉乃大有事于羣望而祈曰請神擇于五人者使主社稷乃徧以璧見于羣望曰當璧而拜者

神所立也誰敢違之既乃與巴姬密埋璧于大室之庭

使五人齊而長入拜

從長幼以次拜

康王跨之靈王肘加焉公

子比公子黑肱皆遠之王弱抱而入再拜皆厭紐楚之

滅蔡也靈王遷許胡沈

三小國

道房申

皆故諸侯

于荆焉王即

位封陳蔡而皆復之隱太子之子廬歸于蔡悼太子之

子吳歸于陳王元年

昭十四年

使然丹簡上國之兵于宗邱

且撫其民使屈罷簡東國之兵于召陵好于邊疆息民

五年而後用師秋九月殺鬬成然以陽句為令尹三年

昭十年王誘戎蠻子嘉穀之取蠻氏既而復立其子五年

昭十年吳伐我戰于長岸大敗吳師獲其乘舟餘皇吳夜

從之大敗我師取餘皇以歸冬遷許于白羽六年

昭十年

遷陰于下陰城郟

陰郟並楚邑

王使費無極為大子建聘于

秦無極勸王取之正月夫人嬴氏至自秦使大子建居

城父使陽句聘于秦拜夫人也冬歸吳蹶由

吳王弟靈王所執

七年

昭十年

王殺大子傳伍奢使司馬奮揚殺大子建建

奔宋宋華氏亂遂越師師逆華氏九年

昭二十年

宋華亥

向寧來奔夏四月景王崩悼王立王子朝作亂冬悼王

崩敬王立十年

昭二十三年

吳伐州來我及諸侯之師救之

令尹陽句卒于軍戰于雞父我師大奔以囊瓦為令尹

城郢十一年

昭二十四年

王為舟師以畧吳疆及圍陽而還

吳踵我滅巢及鍾離而還十二年

昭二十五年

城州屈復姑

人城邱皇遷訾人

州屈邱皇並楚邑

郭巢郭卷

巢卷亦楚邑為之築郭

十

三年

昭二十六年

秋九月王薨

左傳

謚曰平在位十三年

新語楚平王奢侈縱恣不能制下檢民以德增駕百馬而行欲令天下人餒財富利明不可及于是楚國通奢君臣無別

昭王

昭王名軫平王之大子也平王十三年

昭二十六年

薨王即

位冬十一月周敬王入于成周王子朝來奔王元年

昭二

十七年

吳伐我使公子掩餘公子燭庸圍潛我救潛一師

遇于窮一師至于潛吳師不能退吳弑其王僚掩餘奔

徐燭庸奔鍾吾我師還夏四月殺大夫郤宛秋九月殺

費無極盡滅其族四年

昭十年

吳公子掩餘燭庸來奔王

使居養

楚邑

以害吳冬吳執鍾吾子遂滅徐我救徐弗及

遂城夷

夷城父也

使徐子處之五年

昭三十年

吳侵我伐夷侵

潛六

並楚邑

我救潛吳師還吳圍弦我救弦及豫章吳師

還八年

定二年

囊瓦伐吳師于豫章吳敗我師遂圍巢克

之獲我公子繁十年

定四年

蔡滅沈我為沈故圍蔡冬蔡

侯吳子唐侯伐我十二月陳于柘舉吳擊我師大敗之

囊瓦奔鄭五戰及郢昭王取妹芊畀我

平王女

以出涉睢

鍼尹固與同舟王使執燧象以奔吳師

燒火燧擊象尾驚却吳師

遂

濟江入于雲中王寢盜攻之以戈王奔鄖鄖公辛與其

弟巢以王奔隨吳人從之使出王王之兄公子結似王

逃王而已為王曰以我與之隨人卜與之不吉乃辭吳

人王割公子結之心以與隨人盟

當心前割取血以盟

申包胥如

秦乞師十一年

定五年

夏六月申包胥以秦師救我大敗

吳師于沂又敗之軍祥遂滅唐又敗吳師于公壻之谿

沂軍祥公壻
之谿並楚地
冬十月王入郢

穀梁昭王之軍敗而逃父老送之曰寡人不肖亡先
君之邑父老反矣何憂無君寡人且用此入海矣父
老曰有君如此其賢也以衆不如吳以不死不如楚
相與擊之一夜而三敗吳人新書昭王與吳人戰軍
敗昭王走而屨決失之行三十步復旋取屨及至于
隨左右問曰王何惜一跣屨乎王曰楚雖貧豈愛一
跣屨哉惡與偕出弗與偕反也自是楚俗無相棄者

又曰昭王當房而立愀然有寒色曰寡人朝時酒二
醕重裘而立猶惛然有寒氣奈我百姓何是日也出
府之裘以衣寒者出倉之粟以賑饑者居二年闔廬
襲郢昭王奔隨諸當王之賜者請還戰至死之寇闔
廬一夕五徙不能賴楚曳師而去昭王乃復

十二年

定六年

吳敗我舟師公子結又以陵師敗于繁陽

我大惕懼亡遷郢于郢而改紀其政二十年

定十四年

滅頓

以頓子牂歸二十一年

定十五年

滅胡二十二年

定十六年

圍蔡

使疆于江汝之間師還蔡請遷于吳二十五年

哀四

我

克夷虎

蠻夷叛我者

圍蠻氏蠻氏潰蠻子赤奔晉晉執之歸

于我二十七年

哀六年

吳伐陳昭王曰吾先君與陳有盟

不可以不救乃救陳秋七月師于城父卜戰不吉卜退

不吉王曰然則死也再敗楚師不如死棄盟逃讐亦不

如死死一也其死讐乎命公子申為王不可命公子結

亦不可命公子啟五辭而後許將戰王有疾庚寅王攻

大冥薨于城父公子啟與公子申公子結謀潛師閉塗

逆越女之子章立之而後還是歲也有雲如衆赤鳥夾

日以飛三日王使問諸周大史

說苑作大史
史州黎

周大史曰其

當王身乎若禳之可移于令尹司馬王曰除腹心之疾

而寘諸股肱何益不穀不有大過天其夭諸有罪受罰

又焉移之遂弗禳及王有疾卜曰河為祟王弗祭大夫

請祭諸郊王曰三代命祀祭不越望江漢睢章楚之望

也禍福之至不是過也不穀雖不德河非所獲罪也遂

弗祭孔子曰楚昭王知大道矣其不失國也宜哉

左傳
韓

詩外傳作
莊王誤

在位二十七年謚曰昭

惠王

惠王名章昭王妾越女所生也昭王薨章即位于城父

是為惠王元年魯哀公七年也三年

哀九年

我伐陳

陳即
吳故

四年

哀十年

伐陳吳救陳不戰而還七年

哀十三年

伐陳九年

哀十五年

伐吳及桐汭秋齊陳瓘來十年

哀十六年

孔子卒六月

晉伐鄭我救之白公勝作亂殺公子申公子結而劫惠

王欲以公子啟為王啟不可殺之以王如高府

楚別
府 圍

公陽

大穴

宮負王以如昭夫人之宮葉公沈諸梁攻勝

勝縊國寧使公子申之子寧為令尹公子結之子寬為

司馬十一年

哀十七年

滅陳

史記世家在十年

十二年

哀十八年

巴人伐

我圍鄭我敗之于鄭冬周敬王崩元王立十三年

哀十九年

越侵我我追越師至冥不及而還

冥越地史記世家吳來伐楚無越事

秋

我伐東夷三夷男女及我師盟于敖

敖東夷地左傳

二十年

哀二十六年

周元王崩定王立四十二年

悼二十一年

滅蔡四十

四年

悼二十三年

滅杞與秦平是時越已滅吳而不能正江

淮北我東侵廣地至泗上四十八年

悼二十七年

周定王崩

考王立五十七年

悼三十六年

王薨

史記史家

謚曰惠在位五十七年

新序楚惠王食寒菹而得蛭因遂吞之腹有疾不能

食令尹入問疾王曰我食寒菹而得蛭念譴之而不

行其罪是法廢而威不立也譴而行其誅則庖宰食

監法皆當死心又不忍也吾恐蛭之見也因遂吞之

令尹再拜而賀曰臣聞天道無親惟德是輔君有仁

德天之所奉也病不為傷是夕也惠王之後蛭出新

書同

簡王

以下
戰國

聲王

悼王

肅王

宣王

威王

簡王名中惠王之子也簡王元年北伐滅莒六年周考
王崩威烈王立二十四年簡王薨子聲王當即位聲王
六年盜殺聲王子悼王疑即位是年周威烈王崩安王
立悼王二年三晉來伐我至乘邱而還四年我伐周九
年伐韓取負黍十一年三晉伐我敗我大梁榆關我厚

賂秦與之平二十一年悼王薨子肅王滅即位肅王四
年蜀伐我取茲方于是為扞闕以拒之五年周安王崩
烈王立十年魏取我魯陽十一年肅王薨無子立其弟
良夫是為宣王宣王立年周烈王崩顯王立六年周天
子賀秦獻公秦始復彊而三晉益大三十年秦封衛鞅
于商南侵我是年宣王薨子威王商即位威王六年越
王無彊伐齊齊說之伐我越王從之我興師伐之大敗
越人殺王無彊盡取故吳地七年齊田嬰欺我我伐齊

敗之于徐州十一年威王薨

史記世家

懷王 頃襄王

懷王名槐威王之子也威王十一年薨王即位魏聞楚
喪伐楚取我陘山六年使柱國昭陽將兵攻魏破之于
襄陵八邑秦使張儀與楚齊魏相會盟齧彘八年周顯
王崩慎靚王立十四年慎靚王崩赧王立十一年蘇秦
約從山東六國共攻秦王為從約長至函谷關秦出兵
擊六國六國兵皆引而歸十六年秦欲伐齊而楚與齊

從親秦患之乃使張儀南見王請楚絕齊西從儀取商
於之地六百里王大悅乃置相璽于張儀日與置酒宣
言吾復得吾商於之地羣臣皆賀而陳軫獨弔且曰地
未可得而齊交先絕是楚孤也必見欺于張儀弗聽絕
齊齊怒折楚符而合于秦張儀乃謂楚將曰子受地從
某至某廣袤六里王大怒興師將伐秦陳軫曰伐秦非
計也不如與之伐齊是我亡于秦取償于齊也王不聽
發兵西攻秦秦亦發兵擊之十七年戰于丹陽大敗我

軍斬甲士八萬虜屈匄遂取漢中郡王大怒悉國兵復襲秦戰于藍田大敗我軍韓魏聞楚之困乃南襲楚至于鄧楚乃引兵歸十八年秦使約復與楚親分漢中之半以和楚王曰願得張儀不願得地張儀使楚王囚張儀儀私與靳向靳向與夫人鄭袖言于王而出之儀因說王以叛從約而與秦合親約婚姻張儀去是年秦惠王卒二十年齊湣王欲為從長惡楚與秦合乃使使遺王書曰寡人患楚之不察于尊名也今秦惠王死武王

立張儀走魏樗里疾公孫衍用而楚事秦夫樗里疾善
乎韓而公孫衍善乎魏楚必事秦韓魏恐必因二人求
合于秦則燕趙亦宜事秦四國爭事秦則楚為郡縣矣
王何不與寡人并力收韓魏燕趙與為從而尊周室以
案兵息民令于天下莫敢不樂聽則王名成矣王率諸
侯並伐則破秦必矣王取武關蜀漢之地私吳越之富
而擅江漢之利韓魏割上黨西薄函谷則楚之彊百萬
也且王欺于張儀亡地漢中兵銍藍田天下莫不代王

懷怒今乃欲先事秦願大王熟計之王見齊王書猶豫不決下其議羣臣羣臣或言和秦或曰聽齊昭雎曰王必取地于秦而後足以刷恥于諸侯王不如深善齊韓以重樛里疾如是則王得韓齊之重以求地樛里子必言秦復與楚之侵地矣于是王許之竟不合秦而合齊以善韓二十四年倍齊而合秦秦昭王初立乃厚賂于楚楚往迎婦二十五年王入與秦昭王盟于黃吉秦復與我上庸二十六年齊韓魏為楚負從親三國共伐楚

楚使大子入質于秦請救秦遣將將兵救楚三國引兵去二十七年大子殺秦大夫而亡歸二十八年秦與齊韓魏共伐楚楚殺楚將唐昧取我重邱而去二十九年秦復攻楚大破楚楚軍死者二萬殺我將軍景缺王恐乃使大子為質于齊以求平三十年秦復伐楚取八城秦昭王遺王書曰始寡人與王約為兄弟盟于黃棘大子為質至驩也大子陵殺寡人之重臣不謝而亡去寡人誠不勝怒使兵侵君王之邊今聞君王乃令大子質于

齊以求平寡人與楚接境壤界故為婚姻所從相親久矣而今秦楚不驩則無以令諸侯寡人願與君王會武關面相約結盟而去寡人之願也敢以聞下執事王見秦王書患之欲往恐見欺無往恐秦怒昭睢曰王母行發兵自守耳懷王子子蘭勸王行曰奈何絕秦之驩心于是往會秦昭王昭王詐令一將軍伏兵武關號為秦王王至則閉武關遂與西至咸陽朝章臺如蕃臣不與亢禮王大怒悔不用昭睢言秦因留王要以割巫黔中

之郡王欲盟秦欲先得地王怒曰秦詐我而又彊要我
以地不復與秦秦因留之楚大臣患之乃詐赴于齊齊

歸太子太子橫至立為王是為頃襄王乃告于秦

世家作齊

誤今正之曰賴社稷神靈國有王矣頃襄王元年秦要懷王

不可得地楚立王以應秦秦昭王怒發兵出武關攻楚

大敗我軍斬首五萬取析十五城而去二年懷王亡逃

歸秦覺之遮楚道懷王恐乃從間道走趙以求歸趙惠

王不敢入懷王懷王欲走魏秦追至遂與秦使復之秦

懷王遂發病三年懷王薨于秦秦歸其喪于楚楚人皆
憐之如悲親戚諸侯由是不直秦秦楚絕

新書楚懷王心矜好高人鑄金以象諸侯令大國之
君編而先馬梁王御宋王駟乘周召畢陳滕薛衛中
山之君皆象使隨而趨諸侯聞之興師伐楚楚王徵
役萬人且掘國人之墓國人振動晝旅而夜亂齊人
襲楚師之潰懷王逃適秦免尹殺之西河 按此獨
與史記異

六年秦敗韓于伊闕斬首二十四萬秦乃遺頃襄王書
曰楚倍秦秦且率諸侯伐楚爭一旦之命願王之飭士
卒樂得一戰王患之乃謀復與秦平七年楚迎婦于秦
秦楚復平十四年王與秦昭王好惠于宛結和親十五
年與秦三晉燕共伐齊取淮北十六年與秦昭王好會
于鄢秋復會于穰十八年楚人有好以弱弓微繳加歸
鴈之上者王聞召而與之語遂言曰先王為秦所欺而
客死于外怨莫大焉今以匹夫有怨尚有報萬乘白公

子胥是也今楚地方五千里帶甲百萬猶足以踊躍中
野而坐受困臣竊為大王弗取也于是王遣使于諸侯
復為從欲以伐秦秦聞之發兵來伐楚楚欲與齊韓連
和伐秦因欲圖周周王赧使武公

定王曾孫西
周惠公之子

說昭睢

于是計輟不行十九年秦伐楚楚軍敗割上庸漢北地
予秦二十年秦拔我西陵二十一年秦白起拔我郢燒
先王墓夷陵王兵散遂不復戰東北保于陳城二十二
年秦復拔我巫黔中郡二十三年王收東地兵十餘萬

復西取秦所拔我江旁十五邑以為郡距秦二十七年
使三萬人助三晉伐燕復與秦平入天子為質于秦三
十六年王病太子亡歸秋王薨諡曰頃襄史記世家
淮南子頃襄好色不使風議而民多昏亂其積至昭
奇之禍

考烈王

考烈王名元頃襄王之大子也頃襄王薨太子即位以
左徒黃歇為令尹號春申君王元年納州于秦以平是

時楚益弱六年秦圍邯鄲趙告急楚楚救趙七年至新

中中當為市在鉅鹿秦兵去十二年秦昭王卒使黃歇弔祠于

秦十六年秦王政立二十二年與諸侯共伐秦不利而

去東徙都壽春命曰郢二十五年王薨謚曰考烈史記世家

幽王 哀王 王負芻

幽王名悍考烈王之子李園女弟之所生也李園女弟幸于黃歇

有身而後進之考烈王故太史公于幽王之前持書秦趙政立後書呂不韋卒蓋微辭也考烈王薨

幽王即位李園殺黃歇幽王三年秦魏伐楚十年幽王

薨同母弟猶代立是為哀王哀王立二月餘哀王庶兄
負芻之徒襲殺哀王而立負芻為王負芻二年秦伐楚
大破我軍亡十餘城四年秦將王翦破我軍于蕘殺將
軍項燕五年王翦蒙武遂破楚國虜王負芻滅楚名為

楚郡云

史記
世家

始皇本紀始皇二十三年王翦擊荆虜荆王項燕立
昌平君為荆王反秦于淮南二十四年王翦復破荆
軍昌平君死項燕自殺 按昌平君者楚人為始皇

相國攻嫪毐者是也始皇二十一年將攻荊徙昌平
君于郢本紀誤

贊曰楚始蠻夷不與中國通自邲之捷遂扼天下權擠
盟主而上之楚故祖祝融火烈象成也靈平之際焱焰
愈熾然猛勢外灼而陰中闇虛微昭賢楚灰滅矣雖然
東挫于句吳北衄于彊秦天之所壞庸可支乎百昭且
危懷襄何有

尚史卷十六

欽定四庫全書

尚史卷十七

世家十

鑲白旗漢軍李鐸撰

吳世家

始武王十三年終元王四年
凡六百五十年傳三十世

太伯

仲雍

周章

吳太伯弟仲雍太王之子王季歷之兄也季歷賢而有
聖子昌太王欲立季歷以及昌於是太伯仲雍二人乃
犇荊蠻斷髮文身示不可用以避季歷

韓詩外傳太王賢昌而欲季為後也太伯去之吳太
王將死謂曰我死汝往讓兩兄彼即不來汝有義而
安太王薨季之吳告吳伯伯仲從季而歸羣臣欲伯
之立季季又讓伯謂仲曰何以處之仲曰刑有所謂
矣要于扶微者可以立季季遂立孔子曰太伯獨見
王季獨知伯見父志季知父心故太王太伯王季可
謂見始知終而能承志矣論衡太王薨太伯還季歷
三讓不可季歷立是為王季 應劭曰常在水中故

斷其髮文其身以象龍子故不見傷害

太伯之犇荆蠻自號勾吳

正義太伯居梅里

荆蠻義之從而歸之千餘家立為吳太伯

韋昭注武王追封為吳伯故曰吳太伯

太伯卒

皇覽冢在吳縣北梅里聚去城十里

無子弟仲雍立是為吳仲雍仲雍卒

吳地志仲雍冢在吳鄉常熟縣西海虞山上與言偃冢並列

子季簡立季簡卒子叔達立叔達卒子周章立是時武王克殷求太伯仲雍之後得周章周章已君吳因而封之又封周章弟虞仲于周之北故夏墟

在河東
太陽縣

是為虞

仲列為諸侯周章卒子熊遂立熊遂卒子柯相立柯相卒子彊鳩夷立彊鳩夷卒子餘橋疑吾立餘橋疑吾卒子柯盧立柯盧卒子周繇立周繇卒子屈羽立屈羽卒

子夷吾立夷吾卒子禽處立禽處卒子轉立轉卒子頗
高立頗高卒子句卑立是時晉獻公滅周北虞公以開
晉伐虢也句卑卒子去齊立去齊卒子壽夢立壽夢立
而吳始益大稱王自太伯祚吳五世而武王克殷封其
後為二其一虞在中國其一吳在夷蠻十二世而晉滅
中國之虞中國之虞滅而夷蠻之吳興凡十九世至壽
夢又六世而滅吳

史記
世家

壽夢

壽夢元年魯成公六年也吳初屬楚壽夢既即位楚殺

巫臣之族巫臣自晉使于吳壽夢說之乃通吳于晉

左傳

林堯叟注先是吳自安僻陋未嘗與中國相通至是

巫臣因楚乃始通晉

以兩之一卒來舍偏兩之一焉

司馬法百人為卒二十五人為兩車九乘為小

偏十五乘為大偏蓋留車九乘及一兩二十五人令吳習之

與其射御教吳乘車教

之戰陳教之叛楚置其子狐庸使為行人于吳吳始伐

楚伐巢伐許

巢徐楚屬國

蠻夷屬於楚者吳盡取之是以始

大通吳于上國二年

成七年

我八州來

楚邑

十年

成十五年

我會

諸侯之大夫

晉魯齊宋衛鄭邾

于鍾離

楚邑

吳越春秋壽夢元年朝周適楚觀諸侯禮樂魯成公

會于鍾離深問周公禮樂因歎而去曰於乎哉禮也

元年誤朝周適楚亦未聞

十五年

襄二年

秋九月簡王崩靈王立十六年

襄三年

楚公

子嬰齊伐我為簡之師

簡選練也

克我鳩茲至于衡山使鄧

廖帥組甲三百被練三千

組甲漆甲成組大被練練袍也

以侵我我要

而擊之獲鄧廖其能免者組甲八十被練三百而已嬰齊歸我伐駕取駕駕良邑也鄧廖亦楚之良也

吳越春秋十六年楚共王怨吳為巫臣伐之也乃伐吳至衡山而還

夏六月晉會諸侯同盟于雞澤使逆吳子于淮上吳子

不至十八年

襄五年

我會諸侯

晉魯宋陳衛鄭曹莒邾滕薛齊鄆

于戚二

十三年

襄十年

我會諸侯

晉魯宋衛曹莒邾滕薛杞小邾齊

于柵二十五

年

襄十一年

秋九月吳子薨

左傳

在位二十五年壽夢子四曰諸樊餘祭夷昧季札

諸樊

諸樊名遏壽夢之子也壽夢薨諸樊即位諸樊元年

襄十

三年楚共王卒我侵楚戰于庸浦大敗我師獲公子黨我

告敗于晉二年

襄十四年

諸侯之大夫

前諸侯

會我于向諸樊

既除喪將立季札季札辭固立之棄其室而耕乃舍之

秋楚師于棠以伐我我不出而還我自卑舟之隘要而

擊之敗楚師獲其公子宜穀十二年

襄二十四年

楚為舟師

以伐我無功而還冬我召舒鳩人叛楚

舒鳩楚屬國

十三年

襄二十

五年

舒鳩叛楚楚伐之我救之大敗我師遂滅舒鳩

冬十二月諸樊伐楚門于巢巢牛臣射之薨

左傳

在位十三年

餘祭

餘祭號戴吳壽夢之子也諸樊薨餘祭即位餘祭元年

襄二十

六年

楚秦侵我及雩婁聞我有備而還三年

襄二十八年

齊慶封來奔與之朱方冬十二月靈王崩景王立四年

襄二十九年

使公子札如魯聘夏五月闔弒吳子餘祭吳嘗

伐越獲俘焉以為闔使守舟餘祭觀舟闔以刀弒之

左傳

在位四年

夷末

夷末號餘昧又號句餘亦壽夢之子也餘祭弒夷末即

位二年

襄三十一
一年

使屈狐庸聘于晉

屈臣
之子

三年

昭元
年

莒展

與來奔六年

昭四
年

楚以諸侯伐我克朱方殺齊慶封冬

我伐楚入棘櫟麻

並楚
邑

七年

昭五
年

楚子以諸侯及東夷

伐我我敗其偏師于鵠岸楚師及汝清

楚界

我不可入楚

子觀兵于坻箕之山而還八年

昭六年

楚伐徐我救之楚

伐我我敗其師于房鍾獲官廐尹闕棄疾十四年

昭十二年

楚伐徐明年楚弑靈王師還自徐我敗諸豫章獲蕩侯

潘子司馬穀蹯尹午陵尹喜五帥冬我滅州來十七年

昭十五年春正月夷末薨

左傳

在位十七年

吳王僚

吳王僚號州于夷末之子也

先儒以為諸樊之弟誤

夷末薨王僚

即位二年

昭十七年

我伐楚戰于長岸楚大敗我師獲我乘

舟餘皇公子光師夜從之大敗楚師取餘皇以歸七年

昭二十年

夏四月景王崩子朝作亂悼王既立而崩敬王

二年

立楚人復城州來八年

昭二十三年

我伐州來楚及諸侯之

師奔命救州來我禦諸鍾離敗頓胡沈蔡陳許之師于

雞父胡子髡沈子逞滅獲陳夏齧

大

楚師大奔楚太子

建之母在耶

楚邑

召我而啟之冬十月大子諸樊入耶

諸樊

王僚之子
名同前誤

取楚夫人與其寶器以歸九年

昭二十
四年

我滅

巢及鍾離

史記吳之邊邑卑梁與楚邊邑鍾離小童爭桑兩家
交怒相攻滅卑梁人卑梁大夫怒發邑兵攻鍾離楚
王聞之怒發國兵滅卑梁吳王聞之大怒亦發兵使
公子光因建母家攻楚遂滅鍾離居巢楚乃恐而城
郢呂氏春秋畧同 按傳城郢在滅巢之前史誤

十一年

昭二十
六年

敬王入于成周子朝奔楚十二年

昭二
十七

年
我伐楚圍潛

楚邑

夏四月公子光弒王僚

左傳

在位十二年

吳王闔廬

吳王闔廬名光諸樊之子也初為羣公子楚之殺伍奢也其子負來奔負言伐楚之利公子光曰是宗為戮而欲反其讐不可從也負曰彼將有他志乃見鱄設諸于光長岸之役也楚大敗我師獲乘舟餘皇使隨人與後至者守之環而塹之及泉盈其隧炭陳以待命公子光

請于其衆曰喪先王之乘舟豈唯光之罪衆亦有焉請

藉取之以救死衆許之使長鬣者三人潛伏于舟側

長鬣

類楚人

曰我呼餘皇則對師夜從之三呼皆迭對楚人從

而殺之楚師亂我大敗之取餘皇以歸雞父之役也我

伐州來楚以頓胡沈蔡陳許之師奔命救州來我禦諸

鍾離楚令尹陽句卒楚師燭

大滅為燭軍主亡故軍人無復氣勢

公子光

曰諸侯從于楚者衆而皆小國也畏楚而不獲已是以
來吾聞之曰作事威克其愛雖小必濟胡沈之君幼而

狂陳大夫齧壯而頑頓與許蔡疾楚政楚令尹死其師
燔帥賤多寵政令不壹七國同役而不同心帥賤而不
能整無大威命楚可敗也若分師先以犯胡沈與陳必
先奔三國敗諸侯之師乃搖心矣諸侯乖亂楚必大奔
請先者去備薄威後者敦陳整旅吳子從之七月戊辰
晦遣兵忌晦戰戰于雞父吳子以罪人三千先犯胡沈
與陳三國爭之吳為三軍以擊于後中軍從王光帥右
掩餘帥左吳之罪人或奔或止三國亂我師擊之三國

敗獲胡沈之君及陳大夫舍胡沈之囚使奔許與蔡頓
曰吾君死矣師譟而從之三國奔楚師大奔王僚十二

年

昭二十七年

我伐楚使公子掩餘公子燭庸圍潛使季札

聘于上國光曰此時也弗可失也告鱣設諸曰上國有

言曰不索何獲我王嗣也吾欲求之

諸樊兄弟相傳欲以及季札季札不

受宜及諸樊之子故云

事若克季子雖至不吾廢也夏四月光伏

甲于堀室而享王遂弑王僚掩餘奔徐燭庸奔鍾吾光

即位是為闔廬闔廬三年

昭三十四年

闔廬使徐人執掩餘使

鍾吾人執燭庸二公子奔楚楚大封而定其徙闔廬怒

執鍾吾子遂伐徐防山以水之滅徐徐子章禹斷其髮

携其夫人以逆闔廬廬唁而送之使其邇臣從之遂

奔楚四年

昭三十一年

我侵楚伐夷侵潛六楚救潛我師還

我師圍弦楚救弦及豫章我師還用伍員之謀也五年

昭三十二年

我伐越七年

定二年

桐叛楚闔廬使舒鳩氏誘楚

人

桐舒鳩並楚屬國

曰以臨我我伐桐為我使之無忌

教舒鳩誘楚人

以臨吳吳僞若畏楚師臨已伐其叛國以取媚欲使楚不忌

楚果伐我師于豫章我

見舟于豫章

偽將
伐桐

而潛師于巢軍楚師于豫章敗之遂

圍巢克之獲楚公子繁九年

定四年

楚圍蔡蔡侯唐侯因

闔廬伐楚舍舟于淮汭自豫章與楚夾漢楚令尹囊瓦

濟漢而陳自小別至于大別三戰囊瓦欲奔冬十一月

二師陳于柏舉我師擊之楚師亂大敗之五戰入郢楚

子奔隨我師從之謂隨人曰周之子孫在漢川者楚實

盡之天誘其衷致罰于楚而君又竄之周室何罪君若

惠顧周室施及寡人以將天衷君之惠也漢陽之田君

實有之隨人卜與之不吉乃辭我曰以隨之僻小而密
過于楚楚實存之世有盟誓至于今未改若難而棄之
何以事君執事之患不唯一人若鳩楚竟敢不聽命我
師乃退

呂氏春秋闔廬選多力五百人利趾者三千人以為
前陳與荊戰五戰五勝遂有郢東征至于庾廬西伐
至巴蜀北道齊晉令行中國新論闔廬習武試其民
于五湖劒皆加肩流血不肯止

十年

定五年

越入我夏秦師救楚大敗我師于沂

楚地

又敗

我師于軍祥

亦楚地

遂滅唐秋九月夫豎王歸自立與闔

廬戰而敗奔楚我師敗楚師于雍澁秦師又敗我師焚

我師于廩又戰于公壻之谿我師大敗闔廬乃歸

吳越春秋闔廬立夫差為太子使太子屯兵守楚留

止自治宮室立射臺于安里華池在平昌南城宮在

長安闔廬出入游卧秋冬治城中春夏治城外治姑

蘇之臺旦食組山晝游蘇臺射于鷗陂馳于游臺興

樂石城走犬長洲越絕書闔廬宮在高平里射臺二
一在華池昌里一在安陽里南越宮在長樂里東到
春申君府秋冬治城中春夏治姑胥之臺旦食紐山
畫游胥母射于鷗陂馳于游臺興樂辟塞者吳備侯
塞也居東城者所游城也柴碎亭到語兒就李吳侵
以為戰地者也麋湖城者所置麋也櫬溪城者所置
船宮也閭門外郭中冢巫門外冢者冰室也婁門外
雞陂墟所畜雞使李保養之者也胥門外九曲路以

游姑胥之臺以望大湖中闕百姓者也巫櫬城者所
置諸侯遠客離城也撫侯山者治以諸侯冢次者也
古城者所置美人離城也述異記木蘭洲在潯陽江
中多木蘭樹吳王闔閭植用構宮殿

十九年

定十四年

夏五月我伐越陳于橋李大敗我師闔廬

傷將指還薨于陘

左傳

在位十九年

越絕書闔廬冢在闔門外虎邱下池廣六十步水深

丈五尺銅櫛三重墳池六尺玉鳧之流扁諸之劍三千方圓之口三千時耗魚腸之劍在焉千萬人築治之取土臨湖口築三日而白虎居上故號虎邱述異記闔廬夫人墓中周迴八里別館洞房迤邐相屬漆燈照爛如日月金蠶玉燕各千餘隻

夫差

夫差闔廬之子也夫差既立使人立于庭苟出入必謂已曰夫差而忘句踐之殺而父乎則對曰唯不敢忘三

年

哀二

楚圍蔡師還蔡請遷于我二月夫差敗越于夫

椒

吳地

遂入越越行成我及越平闔廬之入郢也召陳侯

陳侯不至是年秋侵陳冬洩庸如蔡聘遂遷蔡于州來

七年

哀六

我伐陳楚子救陳卒于城父八年

哀七

夫差

會魯侯于鄆秋魯伐邾以邾子歸邾茅夷鴻請救于我

九年

哀八

我伐魯克武城又克東陽而進遂次于泗上

我行成及魯盟而還夏齊使來請伐魯魯懼乃歸邾子

邾子又無道夫差討之立其大子草十年

哀九

齊侯使

辭師于我

辭伐魯之師

夫差曰昔我寡人聞命今又草之不

知所從將進受命于君城邦溝通江淮冬使如魯敝師

伐齊十一年

哀十年

夫差會魯侯郕子伐齊南鄙師于郕

齊人弑悼公赴于師夫差三日哭于軍門之外大夫徐

承帥舟師將自海入齊齊人敗之我師乃還秋復使魯

敝師冬楚伐陳公子札救陳十二年

哀十一年

復會魯伐齊

中軍從王胥門巢將上軍王子姑曹將下軍展如將右

軍夏五月克博至于贏

並齊邑

戰于艾陵大敗齊師獲國

書公孫夏間邱明陳書東郭書草車八百乘甲首三千

以獻于魯

左傳

淮南子艾陵之戰也夫差曰夷聲陽句吳其庶乎

使行人奚斯釋言于晉

釋言以辭自解也

曰寡人帥不腆吳國

之役

役卒也

遵汶之上不敢左右唯好之故今大夫國子

興其衆庶以犯獵吳國之師徒天若不知有罪則何以

使下國勝

國語

反役賜伍員死十三年

哀十二年

夫差會魯侯于橐皋復徵

會于衛秋會衛侯于鄆十四年

哀十三年

夏夫差會周單子

晉侯魯侯于黃池六月越伐我大敗我師獲大子友入我我告敗于夫差夫差惡其聞也自剄七人于幕下秋七月及晉魯盟吳晉爭先吳人曰於周室我為長晉人曰於姬姓我為伯卒先晉人

穀梁吳夷狄之國也祝髮文身欲因魯之禮因晉之權而請冠端而襲其籍于成周以尊天王吳王夫差曰好冠來孔子曰大矣哉夫差未能言冠而欲冠也

國語吳王會晉于黃池于是越襲吳邊遽至以亂告
吳王懼合大夫而謀曰無會而歸與會而先晉孰利
王孫雄曰必會而先之吳王昏乃戒令秣馬食士夜
中令服兵擐甲係馬舌出火竈陳士卒百人以為徹
行百行行頭皆官帥攤鐸拱稽建肥胡奉文犀之渠
十行一嬖大夫建旌提鼓挾經秉枹十旌一將軍載
常建鼓挾經秉枹為萬人以為方陳皆白常白旂素
甲白羽之矰望之如荼王親秉鉞載白旗以中陳而

立左軍亦如之皆赤常赤旗丹甲朱羽之矜望之如火右軍亦如之皆玄常玄旗黑甲烏羽之矜望之如墨為帶甲三萬以勢攻雞鳴乃定既陳去晉軍一里昧明王乃秉枹親就鳴鐘鼓丁寧鐔于振鐸勇怯盡應三軍皆譁鉦以振旅其聲動天地晉師大駭不出周軍飭壘乃令董褐請事曰兩君偃兵接好日中為期今大國越錄而造敝邑之軍壘敢請亂故吳王親對之曰天子有命周室卑弱貢獻莫入無姬姓之振

也君今非王室不安平是憂億負晉衆庶不式諸戎
翟楚秦將不長弟以力征一二兄弟之國孤欲守吾
先君之班爵進則不敢退則不可今會日薄矣恐事
之不集以為諸侯笑孤之事君在今日不得事君亦
在今日董褐將還王稱左畸曰攝少司馬茲與王士
五人坐于王前皆進自剄于客前以酬客董褐既致
命乃告趙鞅曰臣觀吳王之色類有大憂小則嬖妾
嫡子死大則越入吳將毒不可與戰主其許之趙鞅

乃令董褐復命曰曩君之言周室既卑諸侯失禮于
天子孤以下密邇于天子無所逃罪今君掩王東海
以淫名聞于天子君有短垣而自踰之况蠻荆則何
有于周室夫命圭有命固曰吳伯不曰吳王君若無
卑天子以干其不祥而曰吳公孤敢不順從君命長
弟許諾吳王乃退就幕而會吳公先歆晉侯亞之
夫差將以魯侯見晉侯魯子服何說之乃止既而悔之
囚子服何夫差欲伐宋殺其丈夫而囚其婦人太宰嚭

不可乃歸越及我平十六年

哀十五年

楚伐我陳使來弔十

七年

哀十六年

孔子卒夏我伐慎

楚邑

白公勝敗我師十八年

哀十七年

越伐我夫差禦之笠澤夾水而陳越子為左右句

卒使夜或左或右鼓噪而進我師分以禦之越子以三

軍潛涉當我中軍而鼓之我師大亂遂敗

說苑越王不墮舊冢而吳人服

冬敬王崩元王立二十一年

哀二十年

越圍我二十三年

哀二十二年

十二年

越滅我使夫差居甬東辭曰孤老矣焉能事君乃

縊越人以歸

以其尸歸
左傳

國語夫差行成曰寡君之師徒不足以辱矣請以金玉子女賂君之辱句踐曰昔天以越賜吳而吳不受今天以吳賜越越可以無聽乎請達王甬句東吾與君為二君乎夫差曰寡人禮先壹飯矣君若不忘周室而為敝邑宸宇亦寡人之願也君若曰將殘汝社稷滅汝宗廟寡人請死又曰使死者無知則已矣若其有知吾何面目以見負也遂自殺越絕書范蠡數

吳王曰王有過五殺忠臣伍子胥公孫聖大過者二
齊無罪伐之大過者三越王繫于天皇之位而使其
芻蕘秩馬比于奴虜大過者四宰嚭讒諛聽而用之
大過者五吳王曰聞命矣以帛寘吾目吾慚見伍子
胥公孫聖又曰夫差冢在猶高西卑猶位越王候干
戈人一累土以葬之近太湖拾遺記越謀滅吳矯以
江南億萬輸吳為庸保又有美女夷光修明以貢于
吳處以椒華之宮貫細珠為簾幌二人當軒並坐

竊窺者謂之神人及越兵入國乃抱二女以逃吳苑
述異記吳王築姑蘇之臺三年乃成上立春宵宮作
長夜飲作天池池中造青龍舟與西施為水嬉于宮
中作海靈宮館娃閣銅溝玉檻梧桐宮在吳宮一名
鳴琴川又曰香水溪西施浴處史記西施越之美
女以獻于吳吳王幸之每入市人願見者先輸金錢
一文孟子註疏引今本無吳越春秋吳亡後越浮西
施于江令隨鷁夷以終墨子西施之沈其美也修文

御覽引

夫差在位二十三年而滅

贊曰闔廬多智卒踐所求及乎水徐肆楚五戰入郢威
且立矣又承之以夫差報越破齊會盟上國當是時吳
幾伯嗟夫使其循道樹德羽翼王室詎知太伯之裔不
遂祚周乎乃養癰于越食毒宰嚭我所以罷楚者轉授之
越威削知奪垂翼海東天庠人與明夷之上六有之夷
其明傷也

越世家

敬王二十四年句踐始立終顯王四十八年凡百七十六年無餘至允常系年莫攷自句踐至

無疆傳

七世

無餘 無壬 無暉 夫譚 允常 句踐

鼫與 不壽 王翳 王之侯 王無疆

越禹之苗裔也

或謂越祝融之後芋姓史伯告鄭桓公曰芋姓菱越不足命也

禹行天

下還歸大越崩而葬焉至少康恐禹迹宗廟祭祀之絕

乃封其庶子于越號曰無餘無餘始受封人民山居雖

有鳥田之利

地理志山上有禹井禹祠相傳下有羣鳥耘田水經
注鳥為之耘春拔草根秋啄其穢

租貢纔給宗廟祭祀之費乃復隨陵陸而耕種

賀循會稽記少康少子號曰于越越國之稱始此越
絕書無餘都會稽山南故越城是也

無餘傳世十餘末君微劣不能自立禹祀斷絕十有餘
載有人生而言語曰我無餘君之苗末衆民喜悅共封
立之以承越後號曰無壬無壬生無暉無暉卒或為夫

譚

輿地志越傳國三十餘葉歷殷至周敬王時有越侯

夫譚

夫譚生允常越之興自允常始

吳越春秋

允常之時與吳王闔廬戰而相怨伐允常卒子句踐即位是為越王元年魯定公之十四年也吳王闔廬聞允常死乃興師伐越越王句踐使死士挑戰三行至吳陳呼而自剄吳師觀之越因襲擊吳師吳師敗于槁李射

傷吳王闔廬闔廬且死告其子夫差曰必毋忘越四年

哀二

句踐聞吳日夜勒兵且以報越欲先吳未發往伐

之范蠡諫曰不可句踐曰吾已決之矣遂興師吳王聞之悉發精兵擊越敗我于夫椒句踐乃以餘兵五千人保棲于會稽吳王追而圍之句踐謂范蠡曰以不聽子故至于此為之奈何對曰持滿者與天定傾者與人節事者與地卑辭厚禮以遺之不許而身與之市句踐曰諾乃令大夫種行成于吳吳不許種還報句踐句踐欲

殺妻子燔寶器觸戰以死種曰吳太宰嚭貪可誘以利
請間行言之于是句踐乃以美女寶器令種間獻吳太
宰嚭嚭乃見大夫種于吳王因說吳王曰越以服為臣
若將赦之此國之利也吳王將許之伍員諫弗聽卒赦

越

史記
世家

夫差與越成句踐說于國人曰寡人不知其力之不足
也而又與大國執讐以暴露百姓之骨于中原此寡人
之辜也寡人請更于是葬死者問傷者養生者弔有憂

賀有喜送往者迎來者去民之所惡補民之不足然後
卑事夫差宦士三百人于吳其身親為夫差前馬

國語

韓非子句踐入官于吳身執干戈為吳王洗馬

句踐之困會稽也喟然歎曰吾終于此乎種曰湯繫夏
臺文王囚羑里晉重耳犇翟齊小白奔莒其卒王霸由
此觀之何遽不為福乎句踐既反國乃苦身焦思置膽
于坐坐卧即仰膽飲食亦嘗膽曰女忘會稽之恥邪

史記

世家

句踐之地南至于句無北至于禦兒東至于鄞西至于姑蔑廣運百里乃致其父兄昆弟而誓之曰寡人聞古之賢君四方之民歸之若水之歸下也今寡人不能將帥二三子夫婦以蕃命壯者無取老婦老者無取壯妻女子十七不嫁丈夫二十不取其父母有辜將免者以告公令醫守之生丈夫二壺酒一犬生女子二壺酒一豚生三人公與之母生二人公與之餼當室者死三年釋其政夫子死三月釋其政必哭泣葬埋之如其子

令孤子寡婦疾疹貧病者納宦其子其達士潔其居美其服飽其食而摩厲之于義四方之士來者必朝禮之句踐載稻與脂于舟以行國之孺子之游者無不鋪無不歌以問其名非身之所種不食非夫人之所織不衣

國語

呂氏春秋越王苦會稽之恥內親羣臣下養百姓以求其心有甘脆不足分弗敢食有酒流之江與民同之身親耕而食妻親織而衣時出行路從車載食以

親孤寡老弱之漬病困窮顏色愁悴不瞻者必身自
食之吳越春秋句踐臣吳至歸越句踐七年也王曰
寡人欲築城立郭分設里閭于是范蠡乃築作小城
周千一百二十一步西北主龍飛翼之樓象天門東
南伏漏石竇象地戶陵門四達象八風城成而怪山
自生者琅琊東武海中山也范蠡曰臣之築城其應
天矣崑崙之象存焉天地卒號以著其實名東武起
游臺其上東南為司馬門立增樓冠其山巔以為靈

臺起離宮于淮陽宿臺在高平駕臺在成邱立苑于樂野燕臺在石室齋臺在襟山句踐之出遊也休息食室于冰厨越王乃升明堂立政翼翼小心出不敢奢入不敢侈王念復吳讐乃苦身勞心夜以接日目卧則攻之以蓼足寒則漬之以水冬常冰夏常握火懸膽于戶出入嘗之中夜潛泣泣而復嘯又曰越王既棲會稽范蠡等曰臣竊見會稽之山有魚池上下二處水中有三江四瀆之流九谿六谷之廣上

池宜于君王下池宜于臣民畜魚三年國當富盈
今本無越絕書會稽山上城者句踐與吳戰敗棲其
中因以下為目魚池又曰句踐將降西至浙江待
詔入吳故有雞鳴墟又曰女陽亭者句踐入官于
吳夫人從道產女此亭養于李鄉句踐勝吳更名女
鄉更就李為語兒鄉又曰龜山者句踐起怪遊臺
也車南司馬門因以炤龜又仰望天氣觀天怪也高
四十六丈周五百三十二步一曰怪山怪山者一夜

自來故謂怪山樂野者越之弋獵處其山上石室句踐所休謀也東郭外南小城者句踐冰室句踐之出人也齋于稷山往從田里去從北郭門炤龜龜山更駕臺馳于離邱遊于美人宮興樂中宿過歷馬邱射于樂野之衢走犬若邪休謀石室食于冰厨領功銓土已作昌土臺藏其形隱其情一曰冰室者所以備羞膳也北郭外路南溪北城者築鼓鐘宮也姑中山者銅官之山也越人謂之銅姑瀆長二百五十里朱

餘者鹽官也越人謂鹽曰餘官漬者工官也富中大塘者治以為義田為肥饒謂之富中拾遺記初越王入國有丹鳥夾王而飛故句踐入國起望烏臺范蠡相越日致千金家僮開算術者萬人收四海難得之貨以為器銅鐵之類積如山阜或藏之井塹謂之寶井奇容麗色溢于閨房謂之游官

句踐欲使范蠡治國政蠡對曰兵甲之事種不如蠡鎮撫國家親附百姓蠡不如種于是舉國政屬大夫種而

使范蠡與大夫諸稽郢行成于吳句踐自會稽歸七年
拊循其士民士民欲用以報吳大夫逢同諫曰國新流
亡今乃復殷給繕飾備利吳必懼懼則難必至且鷙鳥
之擊也必匿其形今吳兵加齊晉怨深于楚越名高天
下實害周室德少而功多必淫自矜為越計莫若結齊
親楚附晉以厚吳吳之志廣必輕戰是我連其權三國
伐之越承其弊可克也句踐曰善

吳越春秋越王曰吳王好服之離體吾欲采葛織布

獻之乃使國中男女采葛作黃絲之布未及遣使吳
王賜之書增之以封東至勾甬西至檣李南至姑末
北至平原縱橫八百里越王乃索葛布十萬甘蜜九
實文筍七枚狐皮五雙晉竹十庾以復封禮吳王得
獻乃復增越之封賜羽毛之飾九枚諸侯之服采葛
之婦傷越王用心之苦乃作苦之詩 詩俚惡不足
錄越絕書葛山者句踐罷吳種葛使越女織布獻于
吳犬山者畜犬獵南山白鹿獻吳故曰犬山其高為

大亭六山者句踐鑄銅鑄銅不爍埋之東坂其上馬
箠句踐遣使取于南社徙種六山飾治為馬箠獻之
吳又曰邱土城句踐所習教美女西施鄭旦宮臺
也女出苧蘿山欲獻于吳恐樸陋故近大道居又曰
麻林山一名多山句踐欲伐吳種麻以為弓弦使
齊人守之越謂齊人多故曰麻林多以防吳以山下
田封功臣射圃者句踐習兵處也射卒陳音死葬民
西故曰陳音山獨婦山者句踐將伐吳徙寡婦致獨

山上以為死士示得專一也防塢者越以遏吳軍也
雞山豕山者畜雞豕將伐吳以食士也浙江南路西
城者范蠡敦兵城也其陵固可守謂之固陵舟室者
船宮也石塘者越所害軍船也杭塢者句踐杭也巫
里句踐所徙巫為一里巫山者越魑神巫之官也死
葬其上江東中巫葬者越神巫無社子孫也死句踐
于中江葬之巫神欲使覆禍吳人船又曰句踐反
國六年皆得士民之衆而欲伐吳于是使之維甲維

甲者治甲系斷修內矛亦雞稽繇者也越人謂人鍛也方舟航買儀塵者越人往如江也治須慮者越人謂船為須慮亟怒紛紛者怒貌也怒至士擊高文者躍勇士也習之于夷夷海也宿之于菜菜野也致之于單單者堵也述異記句踐得范蠡之謀乃示民以耕桑延四方之士作臺于外而館賢士今會稽山有越王臺今交州麻林一名紵林句踐種麻將以弦弓糠頭山句踐貯米于其上春積糠為山會稽之上有

鑄劍洲箭鏃洲往往得箭鏃拾遺記越王使工人桐
昆吾之神採金鑄八劍一拵日二斷水三轉魄四懸
翦五驚鯢六滅魂七卻邪八真剛以切玉斷金如削
土木韓非子越王入宦于吳勸之伐齊以弊吳吳兵
既勝于艾陵張之于江濟強之于黃池故可制于五
湖

居二年

哀十
二年

吳伐齊敗之艾陵大夫種曰臣觀吳王政

驕矣請貸粟以卜其事請貸吳王與之越乃私喜吳既

殺伍負任嚳政居三年

哀十三年

吳王北會諸侯于黃池吳

精兵從王惟老弱與大子留守

史記世家

而越十年不收于國民居有三年之食國之父兄請曰
昔夫差恥吾君今越國亦節矣請報之辭曰昔者之戰
寡人之辜也姑無庸戰父兄又請句踐許之乃致其衆
而誓之曰寡人聞古之賢君不患衆之不足而患其志
行之少恥也今夫差衣水犀之甲者億有三千不患其
志行之少恥而患其衆之不足也今寡人將助天滅之

吾不欲匹夫之勇也欲其旅進旅退也進則思賞退則思刑乃發習流二千教士四萬人君子六千人諸御千人伐吳國人皆勸父勉其子兄勉其弟婦勉其夫故敗吳于囿又敗之于沒又郊敗之

國語

吳告急于王王秘之已盟黃池乃使人厚禮以請成越越自度亦未能滅吳乃與吳平

韓非子越伐吳乃先宣言曰吳王築如皇之臺掘深池罷苦百姓煎靡財貨余為民誅之又曰越王問

大夫種曰伐吳可乎對曰君欲知之試焚宮室于是
焚宮室下令曰救火者死比死敵之賞救火而不死
者比勝敵之賞不救火者比北降之罪人塗其體被
濡衣而赴火者左三千人右三千人又曰越王見
怒鼃而式之御者曰何為曰鼃有氣是歲人有自剄
死以頭獻者故越王將復吳試燔臺而鼓之使民赴
火者賞在火也臨江而鼓之使人赴水者賞在水也
臨戰而使人絕頭剖腹而無顧者賞在兵也墨子越

王好士之勇焚舟失火試其士曰越國之寶盡在此
親自鼓其士而進之士聞鼓音破碎亂行蹈火而死
者左右百人有餘越王擊金而退之淮南子越王一
決獄不辜援龍淵而切其股血流至足以自罰而戰
武士必其死

其後四年

哀十
二年

越復伐吳吳士民罷弊輕銳盡死于齊

晉而越大破吳因而留圍之三年吳師敗越遂復棲吳
王于姑蘇之山吳王使王孫雄肉袒膝行而前請成句

踐不忍欲許之范蠡曰會稽之事天以越賜吳吳不取
今天以吳賜越越其可逆天乎謀之二十二年一旦而
棄之可乎句踐曰吾欲聽子言吾不忍其使者范蠡乃
鼓進兵曰王已屬政于執事使者去不者且得罪吳使
者泣而去句踐憐之乃使人謂吳王曰吾置王甬東君
百家吳王謝曰吾老矣不能事君王遂自殺

越絕書安城里高庫者句踐禽夫差以為勝兵築庫
高閣之周二百三十步

句踐已平吳乃以兵北渡淮與齊晉諸侯會于徐州致貢于周周元王使人賜句踐胙命為伯句踐已去渡淮南以淮上地與楚歸吳所侵宋地于宋與魯泗東方百里當是時越兵橫行于江淮東諸侯畢賀號稱霸王

越絕書句踐平吳春祭三江秋祭五湖因以其時為之立祠于是度兵徐州致貢周室沛歸于宋浮陵以付楚臨期開陽復之于魯越專其功故曰越絕說苑句踐與吳戰大敗之兼有九夷近臣三遠臣五令曰

聞吾過而不告者其罪刑水經注琅琊山名越王句踐之故國句踐并吳欲霸中國徙都琅琊紀年晉出公七年於越徙都琅琊越絕書句踐伐吳霸關東徙琅琊起觀臺以望東海孔子從弟子奉雅琴治禮往奏句踐不可孔子辭按紀年越絕二說謬是時晉久亡孔子亦前卒吳越春秋越王使人如木客之山取元常之喪欲徙葬琅琊三穿元常之墓墓中生燂風飛砂石人莫能入遂置而去句踐乃號令齊楚秦

皆輔周室秦桓公不如命句踐乃攻秦秦引咎乃還
軍人作河梁之詩 說亦謬秦桓公亦久卒淮南子
越王句踐剺髮文身無皮弁搢笏之服拘罷拒折之
容然而勝夫差于五湖南面而霸天下泗上十二諸
侯皆率九夷以朝韓詩外傳越王使廉稽獻民于荆
王荆王使者曰越夷狄之國也臣請欺其使者荆王
曰越王賢人也子慎之使者出見曰冠則得見不冠
不得見廉稽曰夫越周室之列封也不得處于大國

而處江海之陂文身翦髮今來至上國必曰冠得見
不冠不得見如此則上國使適越亦將劓墨文身翦
髮而後得見可乎荆王聞之被衣出謝說范越使諸
發執一枝梅遺梁王餘說同 梁王見春秋後說誤
呂氏春秋客有以吹籟見越王上下宮商和而王不
喜或為之野者而王說之新論越王退吹籟之音而
好鄙野之聲

句踐薨

吳越春秋句踐寢疾謂太子夷興曰吾自禹之後承
元常之德從窮越之地以摧吳跨江涉淮自致于斯
夫霸者之後難以久立慎之哉遂卒新書范蠡負石
而蹈五湖大夫種繫領謝室渠如處車裂回泉自此
之後句踐不樂憂悲薦至內崩而死

子王鼫與即位

紀年于粵子句踐卒次鹿郢立六年卒樂資云越語
謂鹿郢為鼫與

王鼫與薨子王不壽即位王不壽薨

紀年不壽立十年見殺是為盲姑次朱勾立

子王翁即位王翁薨

紀年朱勾三十四年滅滕三十五年滅郟三十七年

朱勾卒

子王翳即位

呂氏春秋越人三弑其君子搜患之逃乎丹穴不肯出越人薰之以艾乘以王與淮南子子搜越王翳也

王翳薨子王之侯即位

紀年翳三十三年遷于吳三十六年七月太子諸咎
弑其君翳十月粵殺諸咎粵滑吳人立孚錯枝為君
明年大夫寺區定粵亂立初無余之十二年寺區弟
思弑其君莽安次無顓立無顓八年薨是為莢燭卯
樂資云號曰無顓蓋無顓後乃次無疆也則王之侯
即無余之也

王之侯薨子王無疆即位王無疆時越興師北伐齊西

伐楚與中國爭強當楚威王時越北伐齊齊威王使人
說越王曰越不伐楚大不王小不伯圖越之所為不伐
楚者為不得晉也韓魏固不攻楚韓之攻楚覆其軍殺
其將則葉陽翟危魏亦覆其軍殺其將則陳上蔡不安
故二晉之事越也不至于覆軍殺將馬汗之力不效所
重得于晉者何也

言韓魏與楚鄰今令越合于二晉
以伐楚然所以重得二晉者何故

越

王曰所求于晉者不至頓刃接兵而況于攻城圍邑乎
願魏以聚大梁之下願齊之試兵南陽莒地以聚常郟

之境則方城之外不南淮泗之間不東商於析鄴宋胡
之地夏路以左不足以備秦江南泗上不足以待越矣
則齊秦韓魏得志于楚是二晉不戰而分地不耕而獲
之不此之為而頓刀于河山之間以為齊秦用所待者
如此其失計奈何其以此王也齊使者曰幸也越之不
亡也吾不貴其用智之如目見豪毛而不見其睫也今
王知晉之失計而不知越之過是目論也王所待于晉
者非其汗馬之力也又非可與合軍連和也將待之

以分楚衆也。今楚衆已分，何待于晉？越王曰：「奈何？」曰：「楚三大夫張九軍，北圍曲沃于中，以至無假之關者三千七百里，景翠之軍北聚魯齊，南陽分有大此者乎？且王之所求者，關晉楚也。晉楚不關，越兵不起。是知二五而不知十也。此時不攻楚，臣以是知越大不王，小不伯。復讐龐長沙楚之粟也。竟澤陵楚之材也。」

索隱讐當作隼邑名竟澤陵當

為竟陵澤復上
文勢脫汎字

越窺兵通無假之關，此四邑者不上貢

事于郢矣。臣聞之圖王不王，其敝可以伯然而不伯者。

王道失也故願太王之轉攻楚也于是越遂釋齊而伐
楚楚威王興兵而伐之大敗越殺王無疆盡取故吳地
至浙江北破齊于徐州

徐廣曰周顯王之四十六年也紀年粵子無疆薨後
十年楚伐徐州無楚敗越殺無疆之語是無疆為無
顓之後紀年不得錄也

而越以此散諸族子爭立或為王或為君濱于江南海

上服朝于楚

史記
世家

贊曰吳挫于陘志報越卒破之越困于會稽陰謀二十
二年卒入吳是故君人者尚其志志王則王志伯則伯
矣然困則時解則弛故易于困而有致命遂志也楚據
吳上游坎險共之無疆納齊游說與齊惡楚用自殄刈
書曰慮善以動動惟厥時不善不時能無殄乎

尚史卷十七